

Gaijbienq

改变

□ Daegsiz/特石 Daegcinz/特覃

(Muq hai: Gwnz ciengz gyang daizheiq nem miz mbaw doz “suenqveh hwnqguh hwngfat lajmbanj moq sevei cuji Dalungz Yangh”. Baihswix baij miz sahfaiz, daiz caz, gyaqbauqceij, cunggyang baij miz aen daiz bangungh ndeu, gwnz daiz miz denva, vwnzgengyaz.)

(Cienz lauxbanj daenj buh sihcangh, naengh youq gwnz sahfaiz sim mbouj onj saek di. Ginh yanghcangj naengh youq baihnaj daiz bangungh. Denva yiengj lo.)

Ginh: (Gipmuengz gaem denva) Mwngz ndei! Deng, gou dwg Ginhyi. Gijmaz?

Gou naeuz mwngz Canj duicangj, dwg mwngz nyauzluenh gaijbienq lij dwg ginzchung mbouj doengzeiq? Dwg ginzchung mbouj doengzeiq cuengq benq dieg haenx? Mbouj dwg gaenq gangj ndei la? Baenzlawz youh gaijbienq ne?

Cienz: (Hwnq ndang, heux bangunghsiz cienq song hop. Yiengq Ginh yanghcangj iet fwngz) Ginh yanghcangj, hawj gou riengz Canj duicangj gangj.

Ginh: (Vadfwngz mbouj ei) Canj duicangj, Cienz lauxbanj seizneix couh youq bangunghsiz caj gou daeuj yaeng ciem habdoengz swngzbau. Gijmaz? Ginzchung yaek daeuj gauq saeh? Daeuj bingzleix?

Naeuz cwngfuj seizbienh dued gij gienz-yungh diegdeih gyoengqde? Ndei, yienghneix ba, Canj duicangj, mwngz baij daiyauij daeuj, mwngz daeuj dem, daeuj bangunghsiz gou daeuj, gou caj sou.

Cienz: Ginh yanghcangj, gaenq dingq rox daxdaenh sou youq ndaw denva gangj maz lo, Ginh yanghcangj, mwngz aeu bang gou. Gou caeux couh maengx benq dieg haenx lo. Mbouj dwg gangj ngoenzneix aeu ciem habdoengz ma? Habdoengz gou cungj daiq daeuj lo. (Cienz lauxbanj daj ndaw daehnaeng mbon geij faenh habdoengz, saeuj geij baez)

Ginh: Cienz lauxbanj, mwngz gaej vueng, saehcingz cungj menhmenh ndaej gaijgez bw.

Cienz: Gou baenzlawz mbouj simgip ne? Mbouj dwg gangj ndei gvaq ma? Canj duicangj ha, Canj duicangj, Mwngz baenzlawz youh gaijbienq? Mwngz haih dai gou bae.

Ginh yanghcangj, mwngz yaek gouq gou cij baenz.

Ginh: Gaej vueng, cwngfuj itdingh bang

mwngz. Mwngz yawj, gou mbouj dwg heuh Canj duicangj daiq ginzchung daiyauij daeuj doxyaeng la? Cijaeu ginzchung daiyauij gvaq daeuj, gou couh miz banhfap gangj hawj gyoengqde fug bae.

Cienz: Ginh yanghcangj, gou rox mwngz miz banhfap. Hoeng, mwngz miz maz banhfap gangj hawj gyoengqde fug bae ne?

Ginh: Benq dieg haenx bau okbae, mboujdan ndaej doinyoengx Dalungz Yangh hwngfat, hix ndaej gig ndei hawj ginzchung demgya souhaeuj. Mwngz hix rox, aenvih vunzhong ok rog, benq dieg haenx miz haujaij cungj vut fwz lo, neix dwg aen vwndiz vut dieg ce'ndwi gig haenqrem ndeu. Mboujguenj baenzlawz, vut dieg ce'ndwi, neix cungj mbouj ndaej!

Cienz: (Yamq bae yamq dauq) Ginh yanghcangj, mwngz deng bang gou cij baenz. Gaiq dieg haenx dwg aen gihdi haifat nungzyez gou fangzhwnz cungj siengj aeu, Ginh yanghcangj itdingh aeu bang gou ha.

Ginh: Cienz lauxbanj, mwngz gaej vueng. (Gwnz naj sawqmwh bienq yiengh angqyangz) Cienz lauxbanj, mwngz yawj, Canj duicangj daeuj lo.

Cienz: (Daj gyae couh iet fwngz okdaeuj, ruihaha nei) Aeya, Canj duicangj, caeux couh muengh mwngz daeuj lo. (Rag fwngz Canj duicangj mbouj cuengq)

Ginh: Canj duicangj, Baenzlawz dan mwngz bouxdog?

Canj: Dwg ha, Ginh yanghcangj yiemz noix?

Cienz: (Gipmuengz gingq hawj song swnj ien) Ndei ha, Canj duicangj, cit ien.

Canj: (Vadfad fwngz) Cienz lauxbanj, gou mbouj cit ien.

Cienz: Mbouj siengj cit hix geb hwnjdaeuj ba. (Ngengh dawz song ci ien geb haiej laeng rwz Canj duicangj bae)

Canj: (Daj laeng rwz nyaeb ien roengzdaeuj, aeu ndaeng nyouqnyouq) Ien ndei, hom dahraix.

Cienz: Dwg ien ndei. (Gvae habfeiz) Canj duicangj, mwngz cit ien.

Canj: Ien gou cit, benq dieg haenx, Cienz lauxbanj mwngz hix gaej siengj aeu.

Ginh: Gijmaz eiqsei? Canj duicangj, gij vah mwngz gig nanz dingq.

Canj: Deng! Ginzchung doxyaeng gvaq lo, cungj naeuz mbouj co lo. Hawj gou daiyauij gyoengqde daeuj gangj hawj Ginh yanghcangj rox.

Cienz: Vihmaz ne? Raeuz mbouj dwg gaenq

yaeng ndei la? Mwngz hix naeuz doengzeiq lo.

Canj: Deng, gou doengzeiq lo. Hoeng ginz-cung mbouj doengzeiq ha, caiq gangj lij caengz youq gwnz habdoengz ciem cih ma.

Cienz: (Simgip byaij bae byaij dauq) Canj duicangj, mwngz yaek gouq gou, gou gaenq caeuj gunghcangj ciem habdoengz lo, lij gyau cienzdingh lo. Ginh yanghcangj, mwngz yaek gouq gou ha.

Ginh: Cienz lauxbanj, mwngz gaej simgip.

Cienz: Gou baenzlawz mbouj gip ha, gienh saeh neix, mboujguenj dwg bouxlawz, bouxlawz cungj gip.

Ginh: (Byaij haiej gyawj Canj duicangj sing daemq cam) Canj duicangj, mwngz lauxsaed lwnh gou, gienh saeh dingh habdoengz neix, caeux couh gangj ndei lo, baenzlawz baez yaepda couh gaijbienq ha? Mbouj dwg siengj saj gou ba?

Canj: Gou baenzlawz gamj saj mwngz ha. Caen dwg gij yigen ginzchung.

Ginh: Caen dwg gij yigen ginzchung?

Canj: (Da lawq neix lawq de) Dang' yienz dwg gij yigen ginzchung.

Cienz: Mbouj deng! Mbouj dwg gij yigen ginzchung.

Ginh: Yienghneix ginzchung daiyauij vih gijmaz mbouj daeuj, dan mwngz daeuj?

Canj: Gou bouxdog daeuj couh ndaej lo.

Cienz: Mwngz ndaej daiyauij ginzchung?

Canj: Dang' yienz.

Cienz: Mwngz baezgonq mbouj dwg naeuz doengzeiq la, baenzlawz youh gaijbienq la?

Canj: Baezgonq dwg daiyauij gou swheij, baezneix dwg daiyauij ginzchung. Danghnaeuz sou gangj ndaej hawj fug bae, gou couh daiyauij ginzchung caiq naeuz cawjeiq.

Ginh: Canj duicangj, gij vah neix dwg mwngz swheij gangj ha?

Canj: Dang' yienz dwg gou gangj.

Ginh: (Naemj yaep he) Ndei! Mwngz gangj gonq, ginzchung doiq aen vwndiz neix baenzlawz gangj?

Canj: Mbouj miz gijmaz gangfap. Dieg dwg guekgya, hoeng ginzchung miz gienz yungh, ginzchung miz mbaw cingq yungh diegdeih, 30 bi mbouj bienq, baenzlawz yungh, ginzchung ndaej guhcawj.

(caengz sat)